



República Democrática Timor-Leste
Reuniaun Parseirus Dezenvolvimentu 2013
DOKUMENTU PREPARATÓRIU
(Background paper)

IMPLEMENTA PLANU DEZENVOLVIMENTU ESTRATÉJIKU

DILI, TIMOR-LESTE
18-20 Juñu 2013

Índise

Introdusaun	1
Programas ho Inisiativas Xave kona-ba Estratéjias Timor-Leste nian	3
Planu Estratéjiku Dezenvolvimentu 2011-2030	3
Programa Kintu Governu Konstitusional 2012-2017	4
Konsekusaun, ka realizaun, Objetivus Dezenvolvimentu Milénium	4
Novu Akordu (New Deal), g7+ no ajenda pós dezenvolvimentu 2015	5
Mekanizmu Koordenasaun kona-ba Polítika Dezenvolvimentu Timor-Leste	6
Objetivus no Funsoens	6
Estrutura Governasaun	6
Informasaun Atual kona-ba Timor-Leste (Timor-Leste update)	Error! Bookmark not defined.
Governu	Error! Bookmark not defined.
Asuntus relasiona ho Setor Estratéjiku Ekonómiku	9
Kresimentu Ekonómiku.....	10
Inflasaun.....	10
Rendimentu Petrolíferu.....	10
Polítika Fiskal Longu Prazu ho Rendimentu Sustentável Estimadu.....	11
Liña de-Orientasaun Ekonómika.....	Error! Bookmark not defined.
Agrikultura.....	12
Turizmu.....	12
Empregu Rejional no Dezenvolvimentu.....	13
Asuntus relasiona ho Setor Estratéjiku Sosial	13
Saúde.....	13
Edukasaun.....	14
Inkluzsaun Sosial.....	16
Asuntus relasiona ho Setor Estratéjiku Dezenvolvimentu	17
Água no Saneamentu.....	17
Eletrisidade.....	17
estradas no Pontes.....	18
Portus no Aeroportus.....	18
Petróleu – Projetu Tasi Mane.....	18
Governasaun no Asuntus relasiona ho Setor Estratéjiku Dezenvolvimentu	18
Boa Governasaun iha setor públiku.....	19
Tranzisaun husi Ajênsia Dezenvolvimentu Nasional ba Ajênsia Polítika Ekonómika no Investimentu.....	20
Desentralizasaun.....	20
Justisa.....	21
Reforma Seguransa.....	21
Relasoens Internasionais no ASEAN.....	21

Aneksus	i
A: Grupu Traballu Setor Estratéjiku Ekonómiku	i
B: Grupu Traballu Setor Estratéjiku Sosial	ii
C: Grupu Traballu Setor Estratéjiku Dezenvolvimentu Infra-Estruturas	iii
D: Grupu Traballu Governasaun no Setor Estatéjiku Dezenvolvimentu Institucional	iv
E: Ministérius Kintu Governu Konstitusional	v

Tabela Figuras

Figura 1 Ensenasaun, ka apresentasaun, Planu Dezenvolvimentu Estratéjiku Timor-Leste nian	3
Figura 2 Estrutura Governasaun Mekanizmu Koordinasaun Dezenvolvimentu	6
Figura 3 Membrus Grupos Traballu Setores	7
Figura 4 Kresimentu PIB 2005-2013	9
Figura 5 Inflasaun 2004-2012	9
Figura 6 Balansu Fundu Petrolíferu	10

Introdusaun

1. Kintu Governu Konstitusional, ne'ebé S.E. Primeiru-Ministru Sr. Kay Rala Xanana Gusmão lidera, simu pose iha fulan Agostu 2012. Rezultadus eleisaun nian mai endosa ka hametin liután buat ne'ebé Kuartu Governu Konstitusional hala'ó ho polítikas ne'ebé define klaru ona iha *Planu Dezenvolvimentu Estratéjiku Timor-Leste nian ba 2011-2030 (the Timor-Leste Strategic Development Plan)*.¹
2. Povu Timor-Leste luta durante tinan ruanulu-resin haat, hasoru difikuldades oioin atu bele hetan nia independênsia. Bainhira finalmente realiza ita-nia mehi harii hikas fali Repúblika Demokrátika Timor-Leste iha 2002 ita hasoru dezafius foun lubun ida. Infra-estruturas bázikas falta barak tebes – pursentu sianulu husi ita-nia eskolas, ospitais no estradas ho tan infra-estruturas bázikas sira-seluk ema harahun hotu durante violênsia depoisde referendu iha 1999. Ita la iha funsionáriu Estadu, no ita povu ida ke moris ho laran no ta'uk tanba konfliktu.
3. Ita tenke tama ia prosesu foun ida – mak konstrusaun paz no konstrusaun Estadu. Povu Timor-Leste sei la haluha no agrade-se tebetebes ba Nasoens Unidas, ho ita-nia belun sira-hotu husi comunidade internasional, ne'ebé tulun ita harii alisereses ba ita-nia instituisoens demokrátikas.
4. Dezde independênsia, iha 2002, Timor-Leste hetan ona progresus boot. Ita mos experimenta retrosesus ka hakat fali ba kotuk, ne'ebé iha buat barak tebes mak tenke halo, maibé einjeral ita sai hanesan “kazu susesu” ida iha dezenvolvimentu internasional. Tinan uluk Timor-Leste hala'ó eleisoens prezidensiais no parlamentares hodi hametin liután ita-nia demokrasia joven ida ne'e. Eleisoens ne'e la'ó ho hakmatek tebes, hafoin Misaun Nasoens unidas mos retira ka husik ita-nia rain hamutuk ho Forsas Estabilizasaun Internasional – hanesan sinal konfiansa ba ita-nia progresu. Timor-Leste agora hamriik mesak ona no tuba rai metin hanesan nasaun independente no soberana.
5. Iha estatísticas ho dadus ne'ebé refleto ita-nia susesu iha *Relatóriu Dezenvolvimentu Umanu 2013 (2013 Human Development Report)*. Iha 1980 Espetativa moris naruk Timornian mak ho de'it tinan 35 (?). Iha 2000 sa'e ba tinan 56, no iha 2012 to'o tinan 63.²
6. Timor-Leste iha Índise Dezenvolvimentu Umanu ho valor 0.576 no hetan 134 lugar husi 187 países no territóriu hodi nune'e koloka ita iha kategoria ho dezenvolvimentu umanu médiu. Entre 2000 no 2012, ita-nia Índise Dezenvolvimentu Umanu nia klasifikasaun sa'e 38 pursentu husi 0.418 ba 0.576. Timor-Leste nia GNI per capita aumenta 356 pursentu entre 2000 no 2012.³ Timor-Leste nia PIB naun-petrolíferu sa'e besik 12 pursentu iha tinan lima laran.
7. Wainhira rekursus finanseirus hahú suli husi rezervas petróleu iha Tasi Timor ita buka estabeselese didi'ak sistemas hodi permite ekuidade inter-jerasional no kombate korrupsaun. Ita kria Fundu Petróleu ne'ebé aumenta maka'as, husi \$1.8 biliaun iha 2007, tinan ne'ebé Kuartu Governu Konstitusional simu pose, ba \$13 bilioens iha tinan ida ne'e.
8. Ita mak primeira iha Ázia, no terseira nasaun iha mundu, ne'ebé kumpri didi'ak Inisiativas kona-ba Transparênsia iha Indústrias Extrativas, ka *Extractive Industry Transparency Initiative*, hodi nune'e kada osan dólar ne'ebé maihusi reseitas petróleu nian bele hatudu ba públiku no tuir dunik rejistus

¹*Timor-Leste Strategic Development Plan 2011-2030*, Dili, July 2011, http://timor-lesste.gov.tl/wp-content/uploads/2012/02/Strategic-Development-Plan_EN.pdf

²*The Human Development Report 2013 The Rise of the South: Human Progress in a Diverse World*, UNDP, Explanatory note on 2013 HDR composite indices Timor-Leste

³*The Human Development Report 2013 The Rise of the South: Human Progress in a Diverse World*, UNDP, 2013

kompañias ka empresas fonte ka rekursu sira-nian. Ita kria daudaun sistema finansas ne'ebé transparente tebetebes; ne'ebé kualker ema iha mundu ne'e bele eventualmente haree hodi hatene oinsá ezekusaun orsamentu iha tempu real, oinsá halo despezas ba osan ajudas nian, hatene kona-ba aprovizionamentu no importante liuhotu, nia rezultadus.

9. Iha tinan sanulu ne'e laran, polítikas sosiais no ekonómikas Governu nian buka nafatin atu reduz pobreza entre ita-nia populasaun, hodi konsolida seguransa no estabilidade nasaun no harii ho hametin instituisoens Estadu. Prosesus ne'ebé hala'o hela kona-ba konstrusaun paz no konstrusaun Estadu sai vital tebetebes hodi hatán ba nesidades ita-nia povu tomak nian iha áreas hanesan saúde, edukasaun, kriasaun kampu traballu ho erradikasaun extrema pobreza, ka moris kiak rabat-rai.

10. Ita nia prestasaun ka dezempeñu boot liu maka Timor-Leste konsege sai hanesan paíz seguru ida menusde dékada ka tinan sanulu laran. Ita-nia labarik sira sente seguros no la ta'uk sai husi uma hodi bá eskola, no famílias sira mos sente seguros wainhira sai kalan nakukun. Maioria países pós-konflitu lori pelu menus tinan 10-20 atu restaura estabilidade. Ohin-loron Timor-Leste benefisia ho paz, estabilidade no kresimentu ekonómiku ne'ebé real. Karakterístikas hirak ne'e hotu refleto gradualmente, ka neineik, iha melloria jeral ba populasaun nia bein-estar, ka moris-di'ak.

11. Maski ho progresu hanesan ne'e, sei iha buat barak mak tenke halo. Hanesan mos ho nasoens pós-konflitu barak, ita la sai hanesan alvu atu atinji los de'it Objektivu Dezenvolvimentu úniku ida. Timor-Leste hasoru dezafius ka sasadik boot, liu-liu relasiona ho prestasaun servisu ho kualidade, falta infra-estruturas bázikas, no dezempregu. Sasadik hirak ne'e hotu ita tenke ultrapasa atu ita-nia nasaun bele erradika ka halakon moris-kiak.

12. Reuniaun Parseirus Dezenvolvimentu Timor-Leste nian tinan 2013 fó mai ita oportunidade dia'k tebes ida atu bele konsentra esforsus husi ita-nia parseirus dezenvolvimentu sira tomak iha implementasaun *Planu Dezenvolvimentu Estratéjiku* ne'ebé hanesan enkuadramentu ka *framework* ida ba Programa Kintu Governu Konstitusional nian ho ita-nia orsamentu anuais. Ne'e elabora bazeia ba prioridades nasionais ne'ebé dezenvolve dezde 2002 no konsidera mos konsultas públikas ne'ebé hala'o iha 65 sub-distritus iha tinan 2009 no 2010 laran. Estratéjias ho asoens iha planu ida ne'e, buka atu transforma Timor-Leste husi paíz ho rendimentu-baixu ka mínimu ba paíz ho rendimentu médiu-altu to'o iha tinan 2030, ho populasaun ida ke saudável, instruída, segura, ne'ebé moris-di'ak no atusuficiente iha ai-hán.

13. Depoisde eleisaun Kintu Governu Konstitusional iha Jullu 2012 Governu foun ne'e apresenta nia programa ba Parlamentu Nasional haktuir Konstituisaun. Programa Kintu Governu Konstitusional, 2012-2017 elabora bazeia ba *Planu Dezenvolvimentu Estratéjiku* hodi konsentra iha implementasaun inisiativas durante tinan lima mandatu Governu ne'e nian.

14. Iha Abril 2013 Governu estabesele Mekanizmu ida kona-ba Koordinasaun Polítikas Dezenvolvimentu hodi implementa, monitoriza no koordena *Planu Dezenvolvimentu Estratéjiku* ho Programa Kintu Governu Konstitusional nian ba tinan lima mai ne'e. Mekanizmu Koordinasaun Polítikas Dezenvolvimentu ne'e, paíz ne'e nian rasik no mos jere rasik, hamutuk ho planeamentu Governu nian ho sistema orsamental. Inklui iha ne'e representantes husi sociedade siviil, setor privadu ho ita-nia parseirus dezenvolvimentu no sei integra ho Governu nia susesus tomak iha nia esforsus atu implementa *Planu Dezenvolvimentu Estratéjiku*.

Programas no Inisiativas Xave kona-ba Estratéjias Timor-Leste nian

15. Iha tinan sira dahuluk depoisde restaurasaun independênsia, Timor-Leste tenke buka responde ba problemas barabarak ne'ebé todan iha tempu ne'ebé badak tebes hodi promove daudaun nesidades imediatas ka urjentes populusaun tomak nian. Ita monu-tama iha siklu konfliktu ida ne'ebé satan netik planu longu prazu nian no ezekusaun monitorizasaun. Depoisde krize 2006, tanba nesidade Governu tenke konsentra liu ba prioridade kurtu prazu nian no ba reestablesimentu seguransa ho estabilidade iha paíz tomak. Prioridades hirak ne'e define iha Programa anual kona-ba Prioridades Nasionais ne'ebé hahú iha 2008. Programa ne'e identifika nesidades espesifikas ba tinan ida mai nian, hafoin grupus traballu mak monitoriza no xefia rasik husi Ministru ka Ministrus responsáveis. Importante mak grupus traballu ne'e inklui sosiedade siviil ho parseirus dezenvolvimentu.


Planu Dezenvolvimentu Estratéjiku Timor-Leste 2011-2030

16. Depoisde período diálogo nasional ne'ebé ko'alia liu-liu kona-ba kauzas ka konfliktu nia huun, ohin-loron Timor-Leste goza daudaun ona período paz no estabilidade. Ne'e permite elabora planu longu prazu nian ida, no iha 12 Jullu 2011, bele halo lansamentu ba *Planu Estratéjiku Dezenvolvimentu* iha Reuniaun Parseirus Dezenvolvimentu Timor-Leste nian iha 2011.

17. *Planu Dezenvolvimentu Estratéjiku* proporsiona enkuadramentu longu prazu nian ida hodi realiza Timor-Leste nia vizaun atu sai paíz ho rendimentu-médiu superior, ho populusaun ne'ebé saudável, bein-instruída no segura to'o tinan 2030. Planu ne'e estabelese pakote integrante ida kona-ba politikas estratéjikas atu implementa iha kurtu prazu (tinan ida to'o lima), iha médi prazu (tinan lima to'o sanulu) no iha longu prazu (tinan sanulu to'o 20).

18. *Planu Estratéjiku Dezenvolvimentu* enkuadra tuir pilares haat; kapital sosial, dezenvolvimentu infra-estruturas, dezenvolvimentu ekonómiku no enkuadramentu institucional. Iha Timor-Leste nia Reuniaun Parseirus Dezenvolvimentu 2011, Governu Timor-Leste ho ita-nia parseirus dezenvolvimentu sira konkorda katak *Planu Dezenvolvimentu Estratéjiku* tenke sai hanesan kuadru jeral ba futurús programas ho projetus.

Figura 1 Ensesasaun Planu Dezenvolvimentu Estratéjiku Timor-Leste nian



Programa Kintu Governu Konstitusional 2012-2017

19. Kintu Governu Konstitusional forma iha fulan Agostu 2012. Programa Kintu Governu Konstitusional, 2012-2017 Parlamentu Nasional aprova iha Agostu 2012.⁴ Programa Governu nian bazeia iha *Planu Dezenvolvimentu Estratéjiku* no políticas ne'ebé haklaken durante kampañas eleitorais 2012 nian.

20. Programa Governu hatudu pista ka dalan luan ida ba dezenvolvimentu paíz iha tinan lima laran. Halo lista kona-ba nesidades ne'ebé presiza atende iha kurtu prazu, incorpora, ka hatama, estratéjias médiu prazu nian no asegura aliñamentu ho objetivus longu prazu nian. Ho hanoin atu kria kampus traballu no kria lailais ona kondisoens moris ne'ebé dí'ak liu ba populausaun, ho prepara estrutura ida ba Governu nia ideias ho idealizmus.

21. Governu foun apresenta orsamentus ba Parlamentu Nasional, Retifikasaun Orsamental ho Orsamentu tinan 2013 nian.

Konsekusaun Objetivus Dezenvolvimentu Miléniu

22. Líderes mundiais iha Simeira Miléniu Nasoens Unidas nian iha 2000 konkorda ho konjuntu objetivus ualu ho nia limitasaun tempu no sasukat hodi kombate pobreza, fome ka hamlaha, iliterasia, doensas, deskriminasaun hasoru fetu sira ho degradasaun ambiental. Iha tempu hala'o Simeira, Timor-Leste sei iha Administrasaun Tranzisaun Nasoens Unidas nian. La kleur, depoisde ita-nia independênsia iha 2002, Timor-Leste integra Objetivus Dezenvolvimentu Miléniu nian iha ita-nia Planu Dezenvolvimentu Nasional ho planus no programas siraseluk tan.

23. Timor-Leste rekoñese katak Objetivus Dezenvolvimentu Miléniu iha áreas pobreza, malnutrisaun, edukasaun, saúde, igualdade jêneru no sustentabilidade ambiental, sei bele ofereze baze real ida hodi hadi'a liután povu nia moris. Maibé hanesan mos ho países pós-konflitu no frájeis, Timor-Leste seidak bele atinji Objetivus Dezenvolvimentu Miléniu tuir data alvu tinan 2015. Áreas hirak ne'ebé sei permanese pratikularmente hanesan dezafius, ka sasadik, mak pobreza, labarik ho pezu mínimu, mortalidade maternal no saneamentu.

⁴available at: <http://timor-leste.gov.tl/wp-content/uploads/2012/09/Program-of-the-Fifth-Constitutional-Government.pdf>

24. Timor-Leste halo daudaun progresus boot relasiona ho objetivus rua: realiza edukasaun primária universal, ho promove igualdade jéneru no hakbiit feto sira. Timor-Leste ultrapasa ona ninia alvus ba Objektivu Dezenvolvimentu Miléniu ne'ebé estabesele ona iha 2004 ba parte rua, taixa mortalidade labarik ho idade tinan lima mai kraik [96/1,000 ne'ebé sei moris] no taixa mortalidade instantânea [53/1,000 ne'ebé sei moris]. Alvus no asoens ba kurtu prazu tinan 5 nian iha *Planu estratéjiku Dezenvolvimentu*, ho hanoin atu lori esforsus Timor-Leste nian ba alkansa barak liután alvus Objektivu Dezenvolvimentu Miléniu.

Novu Akordu, g7+ no agenda Dezenvolvimentu pós 2015

25. Timor-Leste servisu hamutuk no ho espírito solidariedade ho países frájeis sira-seluk ba konstrusaun paz ho konstrusaun estadu. Timor-Leste lidera grupu g7+ kompostu husi 18 nasoens frájeis, hanesan forum ida ne'ebé fakulta lian ida de'it hodi defende mudansa iha políticas kona-ba dezenvolvimentu global. Países g7+ hatene husi sira-nia experiênsias rasik ne'ebé todan tebes, katak la posível atu erradika pobreza se la iha paz ho estabilidade. Maski nasoens hirak ne'e la hanesan, haree husi situasaun jeográfika, linguístikas, kultura, tradisaun, relijiaun ho kauzas prinsipais frajilidade, sira mos iha buat barak mak hanesan iha sira-nia experiênsias kona-ba konstrusaun paz ho konstrusaun Estadu. Mekanizmus pares kombina ho iniciativa internacional husi Diálogo Internacional kona-ba Konstrusaun Paz no Konstrusaun Estadu, ne'ebé Timor-Leste sai hanesan ko-Presidente, ba primeira vez iha istória, fó oportunidade ba membrus g7+ atu modela no influencia política global.

26. Nasoens g7+ sira servisu hamutuk hodi asegura katak agenda dezenvolvimentu pós 2015 bele aborda nesidade kona-ba paz ho estabilidade, no perspectivas kona-ba Estados frájeis sai mos hanesan asuntu sentral ba diálogo global.

27. Mudansa ida ne'e iha pakote agenda reflète prinsipius Novu Akordu, ka New Deal, nian kona-ba Engajamentu, ka envolvimentu, iha Estados Frájeis ne'ebé fó sai iha 30 Novembru 2011 iha Kuartu Fórum Altu Nível kona-ba Efikásia Ajudas iha Busan, South Korea. Novu Akordu ne'e dezenvolve no endosa ona husi g7+ liuhusi forum Diálogo Internacional. Ne'e bazeia ba nesidade ba países eindezenvolvimentu atu hatene sira-nia realidade rasik (sosial, politika no ekonómika), sira-nia frakezas no potênsias, atu nune'e sira bele hala'o sira-nia prosesu dezenvolvimentu rasik ho maneira ne'ebé kredível, responsável no gradual.

28. Novu Akordu ne'e sei dudu dezenvolvimentu sustentável estadus frájeis sira-nian, hakbiit lideransa ne'ebé di'ak liu nian husi países beneficiários no koordenaun ne'ebé di'ak liu iha assistência internacional. Abordajen foun hanesan ne'e la'ós de'it nesária maibé mos urgente. Populasaun serkade 1.5 biliaun iha mundu tomak mak moris iha áreas ne'ebé frajilidade, krime organizado ho konfliktu afeta maka'as.

29. Timor-Leste fó mos ona kontribuisaun maka'as ba agenda dezenvolvimentu pós-2015 liuhusi Ministra Finansas, Emilia Pires, ne'ebé hanesan membru Painel Altu Nível hodi fó pareser ba Sekretáriu-Jeral Nasoens Unidas kona-ba agenda ida ne'e.⁵

30. Hanesan parte husi kometimentu Timor-Leste nian ba agenda pós-2015 iha FEVEREIRU tinan ida ne'e, líderes husi g7+ nasoens, Ázia, Illas Pasífikas no Austrália ho tan Nova Zelândia partisipa iha konferênsia internacional ida ne'ebé Governu rasik mak organiza iha Dili hanesan uma-na'in ho tema "Dezenvolvimentu ba Hotu-Hotu". Konferênsia ne'e simu "Konsensu Dili" ne'ebé define ita-nia prioridades, no esperansas, ba iha agenda dezenvolvimentu pós-2015.

⁵ Kópia Relatóriu Painel Altu Nível Pesos Eminentes, ka Ema mesak koñesidus, Sekretáriu-Jeral nian kona-ba Agenda Dezenvolvimentu Pós-2015 ami bele sdisponibiliza liuhusi <http://www.un.org/sg/management/hlppost2015.shtml>

31. Konsensu Dili konkorda katak abordajens padraun ba dezenvolvimentu la konsege rekoñese katak dezafius, ka sasadik, hirak ne'ebé ita hasoru bele varia, no depende liu ba kontektu lokal. Ne'e signifika katak problemas ho solusoens atu alkansa dezenvolvimentu umanu la hanesan entre nasaun Sudeste Aziátiku kompara ho nasoens iha Illas Pasifikas no katak sei la bele erradika pobreza iha Ázia Pasífiku, no iha mundu tomak, sein primeiru aborda kestoens kona-ba paizes ne'ebé frájeis no afetadus ho konfliktu.

Mekanizmu Koordinasaun Polítika Dezenvolvimentu Timor-Leste nian

32. Iha Abril 2013 Governu aprova estabelesimentu Mekanizmu Koordinasaun Polítika Dezenvolvimentu hodi implementa, monitoriza no koordena *Planu Dezenvolvimentu Estratéjiku Timor-Leste nian* ho *Programa Governu nian* iha tinan lima laran. Bazeia ba lisoens ne'ebé aprende husi Programa Prioridades Nasionais, Mekanizmu Koordinasun Polítika Dezenvolvimentu buat ne'ebé Nasaun nian no nasaun rasik mak jere, hamutuk ho planeamentu Governu nian no sistema orsamental.

33. Ajenda ba Reuniaun Parseirus Dezenvolvimentu Timor-Leste nian estrutura tuir Setores Estratéjikus haat ne'ebé identifika hanesan parte husi Mekanizmu Koordinasaun Polítika Dezenvolvimentu nian, hanesan:

- Setor Estratéjiku Sosial
- Setor Estratéjiku Dezenvolvimentu Infra-Estruturas
- Setor Estratéjiku Ekonómiku, no
- Setor Estratéjiku Governasaun ho Dezenvolvimentu Institucional.

Objetivus no Funsoens


34. Objetivus Mekanizmu Koordinasaun Polítika Dezenvolvimentu mak atu identifika prioridades Governu nian no hadi'a koordinasaun inter-ministruial; planeia, koordena, implementa no monitoriza programas dezenvolvimentu uza abordajen Governu tomak nian; no serve hanesan forum diálogo polítika ida entre Governu ho parseirus dezenvolvimentu.

35. Mekanizmu Koordinasaun Polítika Dezenvolvimentu sei monitoriza progresu, dezafius no rezultadus implementasaun *Planu Estratéjiku Dezenvolvimentu* ho *Governu nia* Programa iha tinan lima laran. Sei suporta liñas ministeriais atu formula planus dezenvolvimentu ministeriais/setorais hodi liga planus asaun anual ho orsamentu, *Planu estratéjiku Dezenvolvimentu* no *Programa Governu*. Importante liu, sei sai hanesan forma ida hotu hodi asegura kooperasaun ho partes interesadas barak, ka multi-stakeholders, no maisde ministru ida mak envolve iha programas/projetus multi-setorais ne'e.

Estrutura Governasaun

36. Estrutura Mekanizmu Koordinasaun Polítika Dezenvolvimentu nian hatudu iha Figura 2.

Figura 2 Estrutura Governasaun kona-ba Mekanizmu Koordinasaun Dezenvolvimentu (MKD/DPCM)



37. Gabinete Primeiru-Ministru jere hela Mekanizmu Koordinasaun Polítika Dezenvolvimentu no hala’o supervizaun ba setores estratéjikus haat. Grupus Setores Estratéjikus haat aliña ho pilares haat *Planu Estratéjiku Dezenvolvimentu Timor-Leste nian* ho *Programa Governu nian*, no coordena polítikas relevantes dezenvolvimentu nian iha multi-setores.

38. Grupus Setores Estratéjikus prezide hamutuk entre Ministérius relevantes ho baze rotasaun kada 3-6 mezes, no sei hetan suporte husi parseirus dezenvolvimentu ne’ebé identifika ona. Sekretariadu Grupus Setores Estratéjikus estabesele iha ministérius ne’ebé responsáveis. Sekretariadu Nasional estabesele iha Gabinete Primeiru-Ministru hodi tulun coordena níveis *inputs* barabarak husi sekretariadaus dedikadus.

39. Relasoens xave define iha tabela okos ne’e.

Figura 1 membrus Grupo Trabalho Setor nin

Setor Estratéjiku	Ko-Prezidentes	Apoia Parseirus Dezenvolvimentu	Sekretariadu	Partisipantes (adisiona ba setores privadu, sociedade siviil & parseirus dezenvolvimentu estratéjikus relevantes)
Setor Estratéjiku Ekonómiku	<ul style="list-style-type: none"> Ministériu Finansas Ministériu Komérsiu, indústri a no Ambiente Ministériu Agrikultura no Peskas 	Banku Mundial	Diresaun Nasional Polítika Ekonómika, Ministériu Finansas	Governu: Ministériu Finansas, Ministériu Administrasaun Estatal, Ministériu Agrikultura no Peskas, Ministériu Petróleu no Rekursus Minerais, Ministériu Turizmu ho Ministériu Komérsiu, Indústri a no Ambiente

<p>Setor Estratéjiku Sosial</p>	<ul style="list-style-type: none"> • Ministériu Solidariedade Sosial • Ministériu Edukasaun • Ministériu Saúde 	<p>AusAID</p>	<p>Ministériu Solidariedade Sosial</p>	<p>Governu: Ministériu Edukasaun, Ministériu Saúde, Ministériu Solidariedade Sosial, Ministériu Komérsiu, Indústrria no Meiu Ambiente, Ministériu Turizmu, Sekretária Estadu Promosaun Igualdade, Sekretaria Estadu Juventude no Desportus, Sekretaria Estadu Formasaun Profisional no Polítikas Empregu</p>
<p>Governasaun no Setor Estratéjiku Dezenvolvimentu Institucional</p>	<ul style="list-style-type: none"> • Ministériu Estadu no Prezidênsia Konsellu Ministrus • Ministériu Estadu Administrasaun Estatal • Ministériu Justisa 	<p>United Nations</p>	<p>Ministériu Estadu no Prezidênsia Konsellu Ministrus</p>	<p>Governu: Ministériu Estadu no Prezidênsia Konsellu Ministrus, Ministériu Defeza no Seguransa, Ministériu Negósius Estranjeirus no Kooperasaun, Ministériu Justisa, Ministériu Administrasaun Estatal, Ministériu finansas, Sekretaria Estadu Asuntus Parlamentares, Sekretaria Estadu Fortalesimenetu Institucional, Ajênsia Dezenvolvimentu Nasional, Komisaun Funsau Públika, Komisaun Anti Korrupsaun, Komisaun Eleisaun Nasional</p>
<p>Setor Estratéjiku Dezenvolvimentu Infra-Estruturas</p>	<ul style="list-style-type: none"> • Ministériu Obras Públikas • Ministériu Transporte no Komunikaun 	<p>Banku Aziátiku Dezenvolvimentu</p>	<p>Sekretariadu Grandes Projetus, Ajênsia Dezenvolvimentu Nasional, Komisaun Aprovisionamentu Nasional</p>	<p>Governu: Ministériu Obras Públikas, Ministériu Transporte no Komunikaun</p>

40. Grupus Traballu Sub-Setores sei estabesele iha kada Setor Estratéjiku, bainhira presiza. Grupus Traballu Sub-Setores ne'e liñas ministeriais relevantes mak sei organiza ho apoiu husi sira-nia parseirus dezenvolvimentu. Grupus Traballu Sub-Setor ba ASEAN sei koloka direktamente iha Gabinete Primeiru-Ministru. Sekretariadu Nasional sei hatuur iha Unidade Jestaun Parseria Dezenvolvimentu nia okos, iha Ministériu Finansas, no ho apoiu husi Nasoens Unidas no parseirus dezenvolvimentu sira-seluk. Portal Transparênsia Ajudas sei utiliza hodi jere asistênsia externa tuir *Planu Estratéjiku Dezenvolvimentu* ho nia pilares no sup-pilares.

Informasaun atual kona-ba Timor-Leste,

41. Eleisoens ba Prezidente Repúblika ho Parlamentu Nasional ne'ebé hala'o ho susesu no hakmatek tebetebes hanesan marku importante ida iha prosesu konstrusaun paz ho konstrusaun Estadu Timor-Leste. Votasaun Prezidensial ne'ebé iha segunda volta no volta ida de'it ba Parlamentu Nasional hala'o ho maneira ne'ebé ordenada no hakmatek la iha insidentes iha nasaun tomak laran.

42. Sua Exelênsia, Taur Matan Ruak, eleitu hanesan Prezidente Repúblika foun Timor-Leste nian. Depoide Prezidente foun toma pose, iha 7 Jullu 2012 hala'o eleisoens ba Parlamentu Nasional. Partidus haat hetan representantes iha Parlamentu Nasional no partidus tolu mak ikus mai forma Governu.

43. Governu foun ne'e koligasaun ida entre Kongresu Nasional Rekonstrusaun Timorens (CNRT), Partidu Demokrátiku ho FRENTE-Mudansa. Líder CNRT, Xanana Gusmão reeleitu Primeiru-Ministru ba mandatu tinan lima. Rezultadu ida ne'e permite Kintu Governu Konstitusional kontinua

harii aliseres nasaun pasifika no estável ida nian, ne'ebé Kuartu Governu Konstitusional ho Governus sira uluk harii ona.

44. Governu foun ne'e kompostu husi Primeiru-Ministru, Vise-Primeiru-Ministru, 15 Ministrus, 12 Vise-Ministrus no 26 Sekretáriu Estadu. Haree Apêndise E ba lista kompletu Ministérius nian. Membrus governu sira ne'e hili konforme estrutura organizasaun nian ne'ebé aliña ho implementasaun *Planu Dezenvolvimentu Estratéjiku*.

45. Ba primeira vez iha istória resente Timor-Leste, governu anterior halo entrega ne'ebé boot no kompletu tebes ba Kintu Governu Konstitusional. Entrega ida ne'e hala'o formalmente durante Reuniaun Parseirus Dezenvolvimentu tinan 2012 no bele asegura tranzisaun ne'ebé diák ba administrasaun foun no kria presedente importante ida iha boa governasaun no iha prosesu konstrusaun Estadu. Relatóriu entrega ne'e fornese informasaun transparente kona-ba estrutura staff funsionáriu Ministérius nian, programas ho projetus ne'ebé sira hala'o, informasaun orsamental, kuadrus legais relevantes ho kapasidade tomak ne'ebé iha hodi suporta programa Governu foun nian. Hanesan rezultadu Governu foun la presiza hahú husi liu kraik, no dezenvolvimentu kontinua sein disruptsaun, ka interrupsaun, hahú kedan husi administrasaun foun nia primeiru dia.

Asuntus kona-ba Setor Estratéjiku Ekonómiku

46. Grupu Traballu Setor Estratéjiku Ekonómiku hanesan grupu ida hotu ne'ebé forma atu koordena implementasaun *Planu Estratéjiku Dezenvolvimentu Timor-Leste nian* no Programa Kintu Governu Konstitusional iha tinan lima ne'e laran. Grupu Traballu Setor Estratéjiku Ekonómiku prezide hamutuk entre Ministériu Finansas, Ministériu Komérsiu, Indústria no Meiu Ambiente, Ministériu Agrikultura no Peskas ho Diresaun Nasional Política Ekonómika, Ministériu Finansas mak provizona servisu sekretariadu. Parseiru dezenvolvimentu ne'ebé lidera apoiu mak Banku Mundial. Seksaun tuir mai estabeselese enkuadramentu kona-ba polítikas no prioridades xave Governu nian Governu ba setor ida ne'e iha tinan lima mai. Detalles seluktán bele haree iha *Apêndise A: Programa Grupu Traballu Setor Estratéjiku Ekonómiku*.

47. Timor-Leste nia ekonomina sa'e maka'as ho taixa kresimentu ne'ebé lais liu hotu iha mundu no ita nia dezempeñu ekonómiku ne'ebé forte hahú kedan husi 2007 prevê katak sei kontinua. Buat ne'ebé ita alkansa hanesan hametin paz, estabilidade no seguransa fó mai ita baze metin hodi aumenta konfiansa iha negósiu. Governu ho konjuntu polítikas ekonómikas lubun ida dudu maka'as ona kresimentu ho ekonomia ne'ebé aberta ka nakloke, política fiskal expansiva, reforma fiskal, liberalizasaun insdústria komunikasoens no melloramentu infra-estruturas. Enkuantu kresimentu forte, inflasaun mos lori risku ekonómiku mai. Esforsus balun hala'o dadaun ona hodi asegura kresimentu inkluzivu, ho pagamentus transferensia no programas dezenvolvimentu extensivu distritu nian, maibé níveis pobreza ne'ebá aas sei mantein no Governu tenke servisu maka'as atu hatuun. Maski seidauk iha dados konkretus, bele haree katak retirada Misaun Integrada Nasoens Unidas husi Timor-Leste iha los de'it impaktu marjinal ba nível atividade ekonómika, liu-liu iha setor ospitalajen no abitasaun.

48. *Planu estratéjiku Dezenvolvimentu* estabeselese enkuadramentu polítikas hodi dezenvolve ekonomia ne'ebé diversifikada. Ne'e inklui abordajen ida kona-ba política fiskal 'karregamentu frontal ka *front loading*' hodi dezenvolve infra-estrutura produtiva esensial no suporta ekonomia ne'ebé forte ho dezenvolve setor privadu ne'ebé sustentável. Propoen mos atu dezenvolve indústrias estratéjikas xave tolu, hanesan petróleu, turizmu no agrikultura hodi sustenta baze ekonómika Timor-Leste nian. Programa ida kona-ba reformas ekonómikas inklui estabeselese Zonas Ekonómikas Espesiais, liberalizasaun telekomunikasoens, loke banku dezenvolvimentu ida no simplifikasaun

regulamentus negósiu ka empresariais, buat hirak ne'e hotu sei dudu maka'as liután progresu, liu-liu, kria oportunitades investimentu no empregu.


Kresimentu Ekonómiku

49. Maski ho kondisoens ekonómikas globais ne'ebé difisil dezde 2007, taixas kresimentu hetan ein média exesu-de 10% kada tinan no Fundu Monetáriu prevê ona katak sei kontinua ho níveis hanesan ne'e. Kresimentu ida ne'e iha ona nia efeitu transformativu ba ekonomia Timor-Leste nian, hodi promove konfiansa iha futuru, enkoraja movimentu negósiu ka atividades empresariais no kria traballus.

Figura 3 kresimentu PIB 2005-2013

50. Kresimentu ekonómiku tulun promove tan ona klase média Timor-Leste nian ida, ne'ebé sai hanesan xave hodi konduz despezas doméstikas sustentadas no suporta setor privadu diversifikadu. Dezafiu xave ida hotu ba Timor-Leste mak hanesan asegura atu kresimentu ekonómiku bele sai inkluzivu no ekilibradu iha nasaun tomak. Polítikas nasionais prinsipais hodi suporta kresimentu ekonómiku iha distritus, descentralizasaun polítika no administrativa ho programa ba Sukus tuir Objektivus Dezenvolvimentu Milénio nian, hamutuk ho asistênsia sosial ne'ebé boot ho programas transferênsias ba idozus, inválidus ho veteranus, hanesan mos polítikas ne'ebé bele asegura katak benefisius ho expansaun ekonómika bele partilla didi'ak duni iha Timor-Leste tomak laran.

Figura 2 Inflasaun 2004-2012



Inflasaun


51. Enkuantu Timor-Leste goza níveis kresimentu maka'as, inflasaun mak sai hanesan risku ekonómiku xave. Inflasaun aumenta dezde Dezembru 2009, atinji díjitus rua iha Marsu 2011 no sa'e aas liu to'ó 14% iha finais 2011. Inflasaun ne'e hafoin modera fali maibé sei kontinua aas liu metas Governu nian no halo presaun maka'as ba iha poder-de kompra lokal no kompetitividade internasional. Timor-Leste la iha alavankas ba polítika monetária nian ne'ebé bele disponibiliza ba nasoens sira-seluk hodi sátan netik inflasaun no tanba ita ne'e ekonomia ki'ik-oan ida ita-nia kapasidade absoritiva mos limitada tebes. Aumentus iha kustus asosia mos ona ho depresiasaun osan US dollar tanba Timor-Leste nia ekonomia depende maka'as tebes ba beins no servisus ne'ebé importa. Polítika fiskal expansiva ne'ebé asosia ho dezenvolvimentu infra-estruturas esensiais no pagamentus transferênsia nian iha mos impaktu maka'as ba níveis presu no forniesimentu mos la consege ekilibra aumentu demanda ka prokura.

Rendimentu Petrolíferu

52. Rendimentu petrolíferu importante tebetebes ba Timor-Leste no iha impaktu ekonómiku boot. Depoisde hahú produsaun petróleu ho gás husi tasi laran iha 2004, Governu nia fluxu anual liuhusi royalties no impostus mos aumenta lais los. Iha finais primeiru trimestre 2013 Fundu Petrolíferu hetan

osan \$13 bilioens. Timor-Leste hanesan paíz ida hotu ne'ebé depende maka'as liu ba petróleu, ho serkade 90% husi orsamentu finansia ho rendimentu husi petróleu. Lei kona-ba Fundu Petrolíferu, ne'ebé Parlamentu Nasional aprova iha 2005 no emenda iha 2011, ezije katak reseitas petrolíferas tomak tenke kanaliza ba Fundu Petrolíferu hafoin mak bele investe ho kuidadu boot iha *assets* ka ativos finanseirus internasionais ne'ebé konsiste husi obrigasoens no asoens. Montante adekuaudu ida transfere ba Orsamentu Estadu conforme aprovasaun Parlamentu Nasional. Transferênsia ida ne'e orienta tuir Rendimentu Sustentável Estimadu (estimadu ho 3%), nu'udar montante ne'ebé oras extras ka *over time* bele gasta no la presiza esgota rikeza petrolifera. Institutu Vijilânsia ba Reseitas ka Revenue Watch Institut iha nia relatóriu kona-ba Índeks Governasaun Rekursus 2013 nian nota katak "Timor-Leste adopta ona sistemas ne'ebé transparentes no responsáveis hodi jere nia rikezas".⁶ Timor-Leste iha 13th lugar husi 58 paízes ne'ebé hetan peskiza no hetan klasifikasaun aas liu ita-nia viziñus balu nia dezenvolvimentu kona-ba salvaguardas ho kontrolus kualidade.

Figura 6 Balansu Fundu Petrolíferu nian (milloens \$)



Polítika Fiskal Longu Prazu nian no rendimentu Sustentável Estimadu

53. Maska Orsamentu Estadu 2013 gasta los de'it Rendimentu Sustentável Estimadu, ka *Estimated sustainable Income*, iha tinan haat ne'e laran Governu tenke foti liután osan hodi finansia despezas ba infra-estrutura. Reseitas doméstikas aumenta no despezas kapital eventualmente deklina ka tuun, entaun exesu iha retiradas ka foti osan sei la presiza. Rendimentu Sustentável Estimadu obriga tenke iha disciplina orsamental no sei kontinua sai hanesan kritériu prinsipal longu prazu nian ba Timor-Leste nia polítika fiskal. Fundu Monetáriu Internasional tulun Timor-Leste determina Rendimentu Sustentável Estimadu. Governu Timor-Leste kompromete atu asegura katak ita-nia níveis despezas públikas sei sustentável nafatin.

Diresaun ka Orientasaun Ekonómika

54. *Planu Estratéjiku Dezenvolvimentu Timor-Leste* nian proporsiona enkuadramentu ida atu bele dezenvolve no estrutura ita-nia ekonomia hodi suporta ekonomia merkadu ne'ebé diversfikada no inkluziva ho setor privadu ida ke forte. Ne'e inklui expansaun iha ita-nia setor agrikultura, dezenvolvimentu setor turizmu ida ke floresente, ka buras tebes, no enkoraja kresimentu pekenas no mikro empresas ka negósios. Maibé, difikuldades hanesan infra-estruturas nasaun nian ne'ebé fraku liu ho mos rekursus umanus, restrinje ka limita dezenvolvimentu ekonómiku Timor-Leste nian. Tanba ne'e mak fundus dedikadus, Fundu Infra-estruturas no Fundu Kapital Dezenvolvimentu, estabelese ona hodi dezenvolve infra-estruturas produtivas no forma ho eduka ita-nia povu.

⁶<http://www.revenuewatch.org/rgi/report#fig1>

55. Atu alkansa Timor-Leste nia vizaun ba longu prazu, definisoens ka konfigurasoens polítika nian ho objetivu atu transforma estrutura ekonomia – sai husi todan boot ida hanesan agrikultura subsistênsia ho setor públiku, ba fali setor privadu ne'ebé sa'e buras, indústrias ne'ebé dezenvolve di'ak ona no expansauns setores servisu. Ne'e sei kria traballus ka servisu barak ho iha mudansa empregu ne'ebé sei bá liu servisu no setor indústria.

Agrikultura

56. *Planu Estratéjiku Dezenvolvimentu Timor-Leste* nian identifika projetus no programas hodi hasoru dezafius no explora oportunidades iha ita-nia setor agrikultura. Meta xave ida hotu mak autu-sufisiênsia iha produsaun alimentar to'o tinan 2020. Enkuantu ita sei iha dalan naruk atu la'o, ita la'o tuir duni dalan atu alkansa alvu ka meta ida ne'e duni. Kolleitas agríkolos no produsaun menus liu iha 2011 tanba kondisoens klimátikas desfavoráveis, ka la di'ak. Maski nune'e tinan 2012 sei di'ak liu ba agrikultores Timoroan sira. Níveis produsaun háre ho bátar iha 2012 aas liu uitoan tinan 2011 nian, ho produsaun total produsu konsumu báziku aumenta pelu menus liu 100,000 Mt iha 2011, ba kuaze 200,000 Mt iha 2012. Realizasaun bele konfirma liuhusi gráfiku importasaun nian. Iha 2011 ita importa serkade 100,000 Mt maibé gráfiku ne'e deklina ka tuun ba menusde 40,000 Mt iha 2012. Aumentu iha produsoens ne'e tanba udan ne'ebé mai tuii tempu no maka'as, mos uza fini ne'ebé di'ak ho material plantasaun nian, mekanizasaun, no agrikultores sira aprende barak husi servisu extensaun Governu nian.

57. Durante tinan neen ne'e laran, Diresoens husi Ministériu Agrikultura no Peskas Nasionais no Distritus nian envolve iha ezersísiu elaborasaun planeamentu estratéjiku hodi produz *road map* ka rotáriu prátiku ida – Planu Operasional Médiu Prazu – ba Ministériu ho ninia partes interesadas. Planu Operasional Médiu Prazu ne'e haree liu ba nesidades boot liu iha setor agrikultura Timor-Leste nian ba tinan lima mai ne'e. Sei hanesan mata-dalan ida ba intervensoens iha dezenvolvimentu no baze ba planeamentu sira tuir mai iha Ministériu Agrikultura ho Peskas.

Turizmu

58. *Planu Estratéjiku Dezenvolvimentu Timor-Leste* identifika turizmu hanesan indústria estratéjika ida hotu hodi sustenta dezenvolvimentu ekonómiku Timor-Leste nian. Timor-Leste nia beleza natural, ka natureza ne'ebé furak, nia kultura ho istória halo indústria turizmu sai hanesan setór indústria únika ka ketak ida, nune'e bainhira dezenvolve ona setor ne'e sei kria servisu barak, hametin no hatudu ita-nia istória ho dezenvolve atividades empresariais, ka negósio, ne'ebé partes rua vizitantes ho nasionais ka ita ema rai-laran bele aproveita no goza hamutuk.

59. Governu estratejikamente pozisiona Timor-Leste hanesan líder rejional ida iha merkadus ekoturizmu, turizmu mariñu, istóriu no aventuras nian. Hanesan parte husi esforsu turizmu Governu nian mak buka atu reabilita infraestruturas, inklui aeroportu nasional, telekomunikasoens ho estradas tuir prinsipais rotas turísticas, partikularmente ida foun nian ne'ebé hanaran *Great North Coast Road*, Estrada Boot husi Kosta Norte, ka tasi-feto, hahú husi Com bá to'o Balibó.

60. Iha Zona Turizmu parte Lorosa'e nian, ne'ebé maihusi Tutuala liu Com ho Baucau no liuhusi Estrada tasi-ibun ba Hera, Governu atu hala'o projetu Estrada prinsipal no servisu hamutuk ho empresas lokais atu nune'e bele oferese experiênsia autêntika, ka real, eko-turizmu nian ba ita-nia vizitantes sira inklui promosaun Parke Nasional Nino Konis Santana.

61. Tanba Dili hanesan portaun, ka oda-matan boot, nasaun ne'e nian, Governu loke ona Sentru Informasaun Turizmu ida iha sidade laran hodi fornese informasaun kona-ba fatin hirak ne'ebé ho interese nasional. Zona Turística Sentral mos inklui illa Atauro ne'ebé hanesan sentru ba eko-turizmu

no mariñu, ho Maubisse, ne'ebé sai hanesan baze ba turizmu ho fatin *trekking*, ka la'o pasiar, iha área ne'e, inklui foho Ramelau.

62. Zona Turística Loromonu inklui Estrada Boot Kosta Norte nian bá Balibo, Maliana, Bobonaro ho rai kafé Ermera. Governu promove daudaun forte Olanda nian iha Maubara no mos ruínas Prizaun Ai Pelo ho futuru muzeu. Importante liu, Governu suporta hela reabilitasaun total ba forte male Portugêz sira harii iha Balibo ne'ebé sei loke iha Setembru tinan ida ne'e, ho konstrusaun otel boutique ida iha forte ne'e laran, ne'ebé sei loke iha 2014. Governu sei dezenvolve no promove mos bee manas Marobo nian atu bele sai hanesan fatin vizita ida hotu ba Zona Turística parte Loromonu nian.

Empregu no Dezenvolvimentu Rejional

63. Atu alkansa objetivus *Planu Estratéjiku Dezenvolvimentu* nian hodi kria tan traballu ka servisu no aselera dezenvolvimentu iha suku hotu-hotu iha Timor-Leste, Governu implementa hela Programa Nasional ba Dezenvolvimentu Suku. Etapa inisial programa ne'e nian sei providensia fundus investimentu komunitáriu maizoumenus \$50,000 ba kada suku. Hein atu investe serkade \$300 milloens durante programa tinan ualu ne'e hala'o.

64. Ho programa ne'e Suku sira sei envolve direktamente iha sira-nia dezenvolvimentu rasik liuhusi planeamentu, konstrusaun no jestaun sira-nia infra-estruturas rasik. Fundus ne'e sei oferese ba comunidades suku nian hodi aselera dezenvolvimentu facilidades infra-estruturas, hadi'a asesu ba servisu no jera tan empregus. Formasaun intensivu sei fó ba membrus comunidade no jovens sira husi distritus hotu-hotu iha planeamentu partisipatóriu, enjeñaria siviil ho jestaun finanseira hodi ekipa, ka kapasita, sira ho koñesimentus no habilidades ne'ebé presiza liu hodi nune'e sira bele tulun sira-nia comunidades implementa programa.

Asuntus kona-ba Setor Estratéjiku Sosial

65. Grupu Traballu Setor Estratéjiku Sosial hanesan grupu ida hotu husi grupus haat ne'ebé kria hodi koordena implementasaun *Planu Estratéjiku Dezenvolvimentu Timor-Leste* ho Programa Kintu Governu Konstitusional iha tinan lima ne'e laran.

66. Grupu Traballu Setor Estratéjiku Sosial prezide hamutuk entre Ministériu Solidariedade Sosial, Ministériu Edukasaun ho Ministériu Saúde no Ministériu Solidariedade mak provizona servisu sekretariadu. Parte ne'ebé lidera apoiu husi parseirus dezenvolvimentu mak Governu Australia liuhusi AusAID. Seksaun tuir mai define enkuadramentu polítikas ho prioridades Governu nian ba tinan lima mai. Detalles seluktán bele haree iha *Apêndise B: Programa Grupu Traballu Setor Estratéjiku Sosial*.

Saúde

67. Hanesan deklara ona iha *Planu Dezenvolvimentu Estratéjiku Timor-Leste* nia Konstituisaun estabelese katak kuidadus médikus hanesan direitu fundamental ba sidadauns hotu-hotu no impoen dever ida ba Governu atu promove no estabelese sistema saúde nasional ida ne'ebé universal, jeral, no ho máximu posível, livre husi enkargus, tenke desentralizadu no partisipatóriu.

68. Iha Outubru 2012 Timor-Leste iha 13 médikus especialistas, 139 médikus iha prátika jeral, 1,271 enfermeirus ho asistentes, 427 parteiras ho 416 téknikus saúde. Númeru médikus aumenta maka'as tebes fulan ida tuir mai, wainhira 400 estudantes Timoroan hetan graduasaun depoisde tinan haat estuda iha Cuba no tinan rua iha Universidade Timor-Leste. Iha tinan 2016 antesipa ona katak sei iha maisde 1,000 médikus Timoroan ne'ebé sei halo prátika hanesan médikus profisionais iha Timor-Leste. Integrasaun ne'ebé la'o di'ak husi médikus sira ne'e iha sistema médisina Timor-Leste nian, sai hanesan prioridade prinsipal Governu nian.

69. *Programa Governu* inklui kometimentu atu presta servisu ba Postus Saúde iha suku ho populasoens 1,500 ba 2,000 lokaliza iha áreas remotas iha tinan lima laran, ho pakote kompreensivu inklui servisu kurativu báziku, programas imunizasaun, kuidadu saúde maternal no infantil, realizasaun programas nutrisaun, tuberkuloze, asistênsia ba kuidadu saúde mental, ho promosaun no edukasaun saúde.

70. Governu kompromete mos atu asegura katak Ospital Nasional Guido Valadares bele ona hahú oferese kuidadu espesializadas no sub-espesializadas. Planeamentu komesa ona ba Ospital Espesialista nian ida iha Dili hodi reduz moras kankru, ho pasientes sira ne'ebé presiza tratamentu husi espesialista nian, maibé tenke ba estranjeiru.

71. Servisu saúde maternal no infantil hadi'a daudaun ona liuhusi asesu ba prestasaun servisu saúde ho kualidade di'ak iha períodu prá-natal, wianhira hahoris, pós-natal no planeamentu familiar hodi hadi'a kuidadu obstétriku emerjênsia nian liuhusi rekoñesimentu, deteksaun antesipada no jestaun ba komplikasoens obstétricas iha comunidade no nível ospitais referênsia (referral). Servisu preventivu ho kurativu ba labarik foin moris sira, bebés ka koso-oan, labarik sira no programas vasina ba labarik sira kontra polio, sarampu, tuberkuloze, difteria no epatites B, no halakon filárizes linfátiku no infesoens ne'ebé da'et husi rai.

72. Aleinde ne'e iha tinan lima mai Governu sei halo lejislasaun hodi regula prestasaun servisu saúde hosi fornecedor privadu no setor naun-lukrativu atu nune'e ezije ba sira kumpri regulamentu ne'ebé aplika ba sistema kuidadu saúde públika; introduz saúde okupasional no padroens seguransa ho kumprimentu rejimentu seluktán, inklui regulamentasaun ba farmásias no lojas retallu naun espesializadu ne'ebé oras ne'e fa'an ai-moruk ba públika, dala barak la iha reseitas.

73. Melloramentu iha nutrisaun kontinua hanesan prioridade Governu nian. Estratéjias atu promove diversidade no konsumu hahán ne'ebé produz lokalmente, hadi'a prátikas kuidadu nutrisaun inan ho labarik sira, hadi'a asesu ba servisu nutrisaun ho kualidade iha instalasoens saúde no iha comunidade, ho programasaun mudansa atitude, ka hahalok, relasiona ho nutrisaun expande daudaun ona.

74. Nesesidades saúde ita-nia idozus sira ho inválidu nian, no ema sira ho defisiênsias saúde mental sei prioritiza nafatin.

Edukasaun

75. Governu hakarak asegura katak labarik sira hotu bele bá eskola no simu edukasaun ho kualidade hodi fó ba sira koñesimentu no kompetênsias atu bele hetan moris ne'ebé saudável, produtivu no kontribui ativamente ba ita-nia nasaun nia dezenvolvimentu. Atu alkansa objetivu ne'e, iha tinan lima mai Governu sei aumenta investimentu ba ita-nia sistema edukasaun hodi asegura katak ita iha infra-estruturas ho pesoal ensinu ne'ebé presiza atu hanorin no kapasita labarik sira atu bele iha asesu ba eduksaun ho kualidade di'ak la presiza haree katak sira ne'e maihusi ne'ebé Timor-Leste.

Ensinu Pré-Eskolar

76. Iha tinan lima mai Governu halo planu atu pelu menus harii 250 pré-eskolas no hadi'a salas sira ne'ebé aat. Governu dezenvolve maka'as formasaun teórica no prátika ba profesores pré-eskolares atu nune'e to'o tinan 2015 pelu menus metade labarik timoroan sira husi tinan tolu to'o lima bele simu edukasaun pré-eskolar ho kualidade. Kona-ba línguas lokais halo ona projetu pilotu iha distritus balu hodi hadi'a asesu ba edukasaun no asegura katak labarik sira iha bazes literasia no koñesimentu kona-ba matemátika.

Ensinu Báziku

77. Kresimentu populasional ne'ebé lais tebes ezije aumenta tan profesores, loke salas eskola no halo despezas edukasaun nian. Governu rekoñese katak iha nesiedade urjente atu hadi'a maka'as tebes qualidade sistema ensinu báziku, inklui melloramentu iha formasaun ba profesores no rekursus umanus sira-seluk. Iha tinan lima mai Governu nia prioridades mak atu matrikula labarik sira hotu iha primeiru anu ensinu báziku tuir idade; reduz *dropouts* ka sira ne'ebé la eskola to'o hotu, ne'ebé oras ne'e to'o 70%; ho enkoraja atu bele remata sira nia ensinu báziku tuir tempu ne'ebé determina. Rekomendasiens kona-ba "Polítika relasiona ho Multilingue" bazeia ba Lian Inan sira iha Timor-Leste", sei implementa atu labarik sira bele hetan literasia mínima ho koñesimentus iha matemátikas. Governu prepara mos orsamentu hodi harii edifísius eskolares ho facilidades ne'ebé proporsionais ho aumentu iha número labaraik ho idade eskolar.

Ensinu Sekundáriu

78. Iha tinan lima mai, Governu hakarak aumenta kapasidade eskolas sekundárias hodi absorve, ka simu tan, número estudantes boot liu ne'ebé kompleta ona ensinu báziku, no habelar sistema ensinu sekundáriu atual iha paíz tomak, liu-liu iha áreas rejionais remotas. Ne'e sei presiza programa infra-estrutura ne'ebé dí'ak hodi harii eskolas modernas ne'ebé bele simu no hanorin estudantes barak liután ne'ebé tama iha ensinu sekundáriu. Kurrikulu foun ensinu sekundáriu nian ida dezenvolve maka'as hela ne'ebé inklui pakote kualifikasoens no koñesimentus ne'ebé bele responde ba ita-nia estudantes sira-nia nesiedades no ba merkadu traballu, aleinde ba ita-nia Nasaun nia nesiedades dezenvolvimentu.

Ensinu Superior

79. Governu dezenvolve hela politéknika eficiente ida ho setor universitáriu hodi oferese ba ita-nia estudantes sira oportunidade atu hetan edukasaun ho qualidade no hola parte iha konstrusaun ita-nia paíz nian. Governu nia prioridades mak iha tinan lima mai atu implementa sistema seguransa ka garantia qualidade ne'ebé saudável, hodi rejista kualifikasoens tomak iha Kuadru Nasional Kualifikasoens no kontinua dezenvolve órgaun garantia qualidade nasional, hanesan Ajénsia Nasional ba Avaliasaun no akreditasaun Akadémika, ne'ebé responsável atu determina padroens ho kritérius hodi asegura qualidade ensinu superior. Aleinde ne'e Governu dezenvolve hela parserias ho instituisoens ensinu superior ho klase mundial no enkoraja esforsu atu koordena apoiu internacional. Institutus Superiores Politéknika, ba kada ida husi ita-nia setores industriais estratéjikus, inklui politéknika enjeñaria iha Suai, politéknika ida ba indústira servisu (turizmu ho ospitalidade) iha Lospalos, politéknika agrikultura nian iha kosta sul ho akademia peskas iha kosta norte sei dezenvolve hotu. Universidade Timor-Leste sei haluan atu nune'e iha médiu prazu bele komposta husi fakuldades hitu: Agrikultura; Enjeñaria, Siênsia no Teknolojia; Medisina ho Siênsias Saúde; Ekonómikas no Jestaun; Edukasaun, Artes ho Umanidade; Lei; no Siênsias Sosiais.

Formasaun Profisional, ka vokasional

80. *Edukasaun Téknika no Profisional* foun ida iha Timor-Leste ho Planu Formasaun dezenvolve bazeia ba *Planu estratéjiku Dezenvolvimentu Timor-Leste* no sei sai hanesan mata-dalan ba dezenvolvimentu setor ensinu profisional. Nia envolve estabelesimentu sistema formasaun nasional ida ho apoiu husi Konsellu Nasional ba Kompetênsias, Empregu no Produtividade ne'ebé sei koloka estudantes sira iha formasaun akreditada ho empresas no estabelese rekompensa formasaun ida ba empresas partisipantes. Polítika Nasional kona-ba Konteúdu Laborais, ka Traballu sei estabelese rekizitus kona-ba empregu no formasaun ba povu Timor iha projetus nacionais. Sei estabelese sentrus kompetênsias ka kapasitasaun Governamentais ka naun-Governamentais iha distritus atu bele hala'o formasaun akreditada ho parserias internacionais hodi posibilita Timoroan sira partisipa iha programas

traballadores óspedes internacionais no Korea Sul ho Austrália, ne'ebé sei habelar liután. Governu suporta daudaun aprendizajens durante ema nia moris tomak no hakarak elimina iliterasia to'ó 2015 liuhusi aumenta kapasidade husi ita-nia programas literasia nasional atuais.

Inkluzoan Sosial

81. Tulun ema-kiak no vulneráveis sira iha ita-nia sociedade; ita-nia labarik sira, feton sira iha risku hetan abuzu, famílias kiak, idozus, veteranus no vítimas deastres naturais, ne'e mos hanesan obrigasaun no prioridade kontínuu Governu nian.

Veteranus

82. Governu kontinua onra pasadu no ita-nia erois nasionais sira hodi fó tulun ne'ebé ita-nia veteranus sira merese dunik. Governu sei estabelese Konsellu Veteranus iha distritus hodi suporta prosesu verifikasaun no asegura atu veteranus ho sira-nia familias bele hetan moris ho dignidade. Governu elabora mos sistema alokasaun bolsas estudu ba labarik Mártires ho Kombatentes Libertasaun Nasional sira-nia oan, hodi fó prioridade ba famílias menus previlijeidas.

Igualdade Jêneru

83. Hanesan rezultadu husi eleisaun 2012 mak 38% Membrus Parlamentu mak feto – persentajen boot liu fetu nian eleitas ba Parlamentu iha Ázia. Resultadu hanesan ne'e tanba emenda halo ba Lei Eleitoral Parlamentu nian iha 2011, hodi aumenta kuota fetu nian iha listas kandidatura, katak tenke hetan fetu ida entre mane tolu. Timor-Leste oras ne'e prepara hela ba descentralizasaun liuhusi estabelesementu munisipius no sei halo esforsus lori enkoraja kandidatas fetu atu partisa iha eleisoens munisipais.

84. Governu servisu hela atu implementa asoens tuir *Planu Dezenvolvimentu Estratéjiku* ho objetivu atu kria sociedade ida ho igualdade-jêneru inklui integrasaun perspectiva kona-ba jêneru ho introdusaun leis, políticas, programas, prosesus no orsamentus ne'ebé responsivus ba jêneru; sensibilizasaun kona-ba jêneru, hadi'a servisus bázikus no moris nian ba fetu sira; no suporta maka'as empregu ho kbiit foti desizaun fetu sira-nian.

85. Integrasaun perspectiva kona-ba jêneru sei hala'ó liuhusi Mekanizmu Koordenasaun Políticas Dezenvolvimentu. Grupos Traballu Jêneru iha níveis Ministeriais no Distritais sei supervizona orsamentasaun responsiva ba jêneru, planeamentu no monitorizasaun ba implementasaun atividades. Lei Kontra Violência Doméstica aplika daudaun ona no Planu Nasional Asaun kona-ba jêneru haree liu ba violência, 2012-2014 nian, implementa hela hodi hamenus violência doméstica ho violência ba jêneru.

Juventude no Desportu

86. Ho populasaun maisde 60 pursentu ho idade menusde 25 anos, ita-nia populasaun joven hasoru difikuldades tanba taixas dezempregu ne'ebé aas tebes no sira ne'ebé hetan servisu mos barak mak iha servisu ne'ebé la iha kualifikasoens no hasoru situasoens empregu ne'ebé ladún dí'ak. Populasaun joven sai hanesan sentru atensaun iha Governu nia programas edukasaun no formasaun profesional ka vokasional. Sei kria Fundu Juventude nian ida ho Sentru Nasional Juventude nian iha Dili hodi proporsiona formasaun iha arte, música, desportus ho edukasaun sívika. Governu kontinua promove no desenvolve facilidades desportu nian ho ekipamentu iha distritus.

Asuntus kona-ba Setor Estratéjiku Dezenvolvimentu

87. Grupu Traballu Setor Estratéjiku Infra-Estruturas hanesan grupu traballu ida hotu ne'ebé estabelese atu koordena imlementasaun *Planu Estratéjiku Dezenvolvimentu Timor-Leste* no Programa Kintu Governu Konstitusional iha tinan lima mai.

88. Grupu Traballu Setor Estratéjiku Infra-Estruturas prezide hamutuk entre Ministériu Obras Públikas ho Ministériu Trnaspote no Komunikaun ho Sekretariasu Grandes Projetus, Ajensia Nasional Dezenvolvimentu, no Komisaun Nasional Aprovizionamentu mak provizona servisu sekretariadu. Parseiru Dezenvolvimentu ne'ebé lidera apoiu mak Banku Aziátiku Dezenvolvimentu. Seksaun tuir mai estabelese enkuadramentu kona-ba polítika no prioridaes Governu nian ba tinan lima mai. Atu hetan tan detalles bele haree iha *Apêndise C: Programa Grupu Traballu Setor Estratéjiku Infra-estruturas*.

89. *Planu Dezenvolvimentu Estratéjiku Timor-Leste* estabelese planu infra-estruturas nian ida hodi suporta kresimentu sustentável nasaun nian no aumenta produtividade, kria tan servisu/traballu no suporta dezenvolvimentu setro privadu. Programa infra-estruturas inklui jersaun enerjia ka eletrisidade, konstrusaun liña rodoviária nasional, harii portu nasional, hadi'a kapasidade aeroportu no dezenvolvimentu kosta sul ho baze iha petroleu Tasi Mane.

Bee ho Saneamentu

90. Abastesimentu bee moos, saneamentu báziku ho drenajen ne'ebé efisiente ne'e importante tebes ba Timor-Leste nia futuru tanba bele lori hadi'a saúde pública, kria tan kampu traballu, enkoraja dezenvolvimentu rural no ajuda kuida no bali didi'ak ita-nia bee-matan ne'ebé ho valor boot tebes hamutuk ho infra-estruturas sira-seluk.

91. Governu investe daudaun iha obras prinsipais ba bee no saneamentu iha rurais, rejionais no áreas urbanas, eskolas no mos iha Dili. Iha tinan lima mai, sei instala pelu menus 400 sistemas bee iha 25,000 uma-kain rurais no Governu sei tulun harii comunidade sira-nia toalete, ka hari'is fatin ho sintina, no rekruta 88 fasilitadores ba bee no saneamentu sub-distritus nian ba suku tuir Programa Abastesimentu Bee no Saneamentu Rural. Reabilita sistemas abastesimentu bee ne'ebé iha ho dalan, sistematikamente, hadi'a vazamentu bee, ka bee sai-estraga, hadi'a pipas ne'ebé aat, válvulas no metrajens, treinu ema sira lee metrajens no kria sistema faturas, ne'e hotu hanesan prioridade.

92. Governu implementa hela Planu Diretor/Regulador ka Master Plan kona-ba Saneamentu no Drenajen Dili nian hodi reduz riskus saúde no promove dezenvolvimentu ekonómiku. Planu ne'e hakarak alkansa mellorias konkretas iha saneamentu ho dalan halo rehabilitasaun ba esgotus no haketak esgotus husi drenajen udan-been nian liuhusi konstrusaun esgotus intersepsaun. Governu sei haree liu ba áreas ne'ebé ho densidade populaun médiu no superior, hamutuk ho áreas komérsiais, indústriais no institusionais hodi prioriza mellorias iha sanemaentu. Governu hala'o hela traballu peskiza enjeñaria ne'ebé presiza tebes atu bele tulun comunidades lokais ho solusoens lokais kona-ba problemas drenajen. Manutensaun ba drenajens ne'ebé iha ona sei sai hanesan parte xave solusoens hirak ne'e hotu.

93. Atu rezolve problemas inundasaun iha Dili, Governu implementa hela Planu Diretor (Master Plan) kona-ba Saneamentu no Drenajen Dili nian. Iha tinan lima mai, sei envolve limpeza detritus, ka sasán rahun no fo'er husi bee dalan, kanu-laran, basias retardamentu no hadi'a drenajen estradas.

Eletrisidade

94. Fornesimentu eletrisidade ne'ebé di'ak buat ida ke vital tebes hodi hadi'a qualidade moris no suporta kresimentu no dezenvolvimentu urbanu no rural. Tanba ne'e mak Timor-Leste prioriza

jersaun enerjia ka eletrisidade no halo kompletu ona programa infra-estruturas Timor-Leste nian ida ne'ebé boot tebes, mak rede elétrika nasional ho sistema transmisaun no distribuisaun ne'ebé efetivu.

Estradas ho pontes

95. Timor-Leste presiza rede rodobiária di'ak ida hodi liga nia comunidades, promove dezenvolvimentu rural, indústria no turizmu ho provizona servisu públikus. Timor-Leste embarca, ka tama ona, iha investimentu longu prazu nian kona-ba estradas, ne'ebé sei inklui programa prinsipal mak hanesan rehabilitasaun, reparasaun no melloramentu estradas nacionais no rejionais.

96. Programa ida ne'e sei inklui mos projetus konstrusaun estradas principais rua ne'ebé sei komesa iha 2013 ho orsamentu \$53 milloens husi parseria Timor-Leste ho Banku Aziátiku Dezenvolvimentu ba Estrada husi Dili-Liquica no Tibar-Gleno no \$92 milloens husi parseria Timor-Leste ho JICA ba estrada Dili-Baucau.

Portus ho aeroportu

97. Timor-Leste presiza portu nasional foun ida tanba oras ne'e ita depende tomak los ba portu Dili ba ita-nia importasoens ho exportasoens karga ein-jeral. Média kresimentu movimentasaun kontentores iha portu Dili durante tinan 7 ne'e laran kuaze 20% no todan tebetebes ba portu ne'e atu akomoda. Kapasidade portu nian ne'ebé limitada signifiika katak bele iha *long berthing backlog*, katak liña naruk sasan bou-butuk hein atu hasai. Signifiika mos katak ró sira ne'ebé lori karga ho pasajeirus mai Timor-Leste tenke hein. Tanba ne'e mak Timor-Leste sei konstroe portu nasional ida iha baia, ka tasi Tibar, besik hela Dili. Projetu ida ne'e sei involve dragajen boot, katak tenke kee kle'an no hamoos didi'ak, no harii facilidades portuárias inklui parke ba kontentores, edifísius terminal no gindastes móveis.

98. Timor-Leste presiza mos halo dezenvolvimentu boot ba aeroportu tanba la iha kapasidade atu atende nesidades kona-ba pasajeirus iha futuro, kona-ba aviasaun no seguransa ho atu permite dezenvolve ita-nia indústria turizmu. Ita ezamina hela ho kuidadu opsoens dezenvolvimentu ne'e ho nesidades ne'ebé bele inklui instalasoens ba terminal foun ida, resintu, ka fatin ida, ba estasionamentu veíkulus, servisu karga no terrenu, espasus komersiais ba retallus, pista naruk ida ho muru protesau husi tasi ibun.

99. Kooperasaun Internacional Finansas nian atualmente servisu ho Governu kona-ba portu Tibar ho Aeroportu Nasional atu prepara ba projetus ne'ebé atu hala'o turi Parserias Públiku-Privadas.

Petroleu – Projetu Tasi Mane

100. Atu lori dezenvolvimentu petróleu mai ita-nia rain no fornese dividendu diretu husi atividades industria petrolífera nian, sei harii infra-estruturas apoiu iha kosta sul Timor-Leste, liuhusi Projetu Tasi Mane. Ne'e sai hanesan dezenvolvimentu pluri-anual ba klusters, ka sentrus industriais tolu inklui kluster Baze Apoiu ka Abastesimentu Suai, kluster Refinaria Betano no Indústria Petrokímika ho kluster Sentral-GNL/LNG Beaco. Dezeñu preliminaríu ho traballus konstrusaun hahú tiha ona no dezenvolvimentu infra-estruturas hirak ne'e sei iha impaktu transformativu ba Timor-Leste nia ekonomia ho sosiedade.

Asuntus Setor Estratéjiku Governasaun no Dezenvolvimentu Institucional

101. Grupu Traballu Setor Estratéjiku Governasaun ho Dezenvolvimentu Institucional hanesan grupu traballu ida hotu ne'ebé estabelese hodi koordena implementasaun *Planu Estratéjiku Dezenvolvimentu* ho Programa Kintu Governu Konstitusional iha tinan lima mai.

102. Grupu Traballu Setor Estratéjiku Givernasaun ho Dezenvolvimentu Institucional prezide hamutuk entre Ministériu Estadu Prezidênsia Konsellu Ministrus, Ministériu Administrasaun Estatal,

Ministériu Justisa, ho Ministériu Estadu Prezidênsia Konsellu Ministrus mak provizona servisu sekretariadu. Parseiru dezenvolvimentu ne'ebé lidera apoiu mak Nasoens Unidas. Seksaun tuir mai define enkuadramentu polítikas ho prioridades Governu nian ba tinan lima mai. Detalles seluktán bele haree iha *Apêndise D: Programa Grupu Traballu Setor Estratéjiku Governasaun ho Dezenvolvimentu Institucional*.

Boa Governasaun iha Setor públiku

103. Boa governasaun iha funsaun públika iha importânsia boot tebes ba Kintu Governu Konstitusional. Nia mak bele asegura konfiansa públika iha governu no iha ita-nia instituisoens demokrátikas. Mellorias ho reformas iha Ministériu Finansas nia rezultadu mak ba primeira vez iha istória halo Rekonsiliason Kompletu ba Kontas; significa katak kontas Governu nian iha Tezouru agora ne'e rekonsilia tomak ona ho kontas Governu nian iha Banku Sentral. Agora bele ezije ona ba jestaun sénior iha Ministériu Finansas atu asina Deklarasoens kona-ba Asset ka Ativus no Kontratus Dezempeñu ho Indikadores Xave Dezempeñu nian, buat rua ne'e halo ba primeira vez iha funsaun públika Timor-Leste nian. Investimentu husi Governu la'o tuir sistemas ne'ebé transparentes no bele responsabiliza, ne'e mak hanesan rezultadu iha Australia sira primeiru doador ne'ebé utiliza Timor-Leste nia sistemas nasionais.

Instituisoens xave governasaun nian

104. Inisiativas signifikantes governasaun nian ne'ebé implementa ona inklui estabelesimentu Komisaun Funsau Públika ho Komisaun Anti-Korrupsaun no aumentu poderes Gabinete Inspektor-Jeral nian hodi permite nia atua independentemente iha inspesaun no auditoria ba ministérius ho ajênsias governamentais. Governu sei kontinua suporta Komisaun Anti-Korrupsaun hodi fó rekursus no fundus ne'ebé presiza lori hala'o nia mandatu importante ne'e. Komisaun Anti-Korrupsaun metodikamente kapasita nia an rasik no sai hanesan instituisaun sentral no importante tebes ida iha kombate hasoru korrupsaun.

105. Komisaun Funsau Públika kontinua kaer papel sentral hodi hadi'a governasaun funsau públika nian. Aleinde papel importante ne'e Komisaun Funsau Públika mos hala'o knaar relasiona ho disciplina no má konduta hodi kontinua asegura katak funsau públika profesional tebes duni, onesta, responsiva no imparcial politikamente. Tribunal Superior Administrativu, Fiskal no Kontas, hanesan órgaun judisial ida ne'ebé konsagra ona iha Konstituisaun, sei hala'o auditorias independentes Estadu nian no mos revizaun ba arranjus kontratus Governu nian

Inisiativas Transparênsia

106. Timor-Leste hanesan primeira nasaun iha rejiaun Ázia Pasífiku, no terseira iha mundu, mak kumpri di'ak los Inisiativas Transparênsia relasiona ho Indústrias Extrativas no agora konsidera ona hanesan bele lidera inovasoens kona-ba mellores práttikas iha jestaun rekursus. Hanesan signatáriu ida ba Inisiativas Transparênsia Indústrias Extrativas, Timor-Leste publikamente responsabiliza ba osan ne'ebé selu husi kompañias rekursu sira ne'ebé opera iha Timor-Leste, ho osan ne'ebé Governu selu. Informasaun ida ne'e Banku Sentral Timor-Leste disponibiliza ba públiku liuhusi Relatórius Trimestrais Fundu Petróleu nian no husi Autoridade Petrolífera Timor-Leste nian.⁷

107. Governu Timor-Leste kaer metin ba prinsípius ne'ebé fundamenta Inisiativas Transparênsia Indústrias Extrativas nian no kontinua dezenvolve baze dados *on-line* ne'ebé bele dehan asesível, komprensivu no transparente liuhotu iha mundu, kona-ba informasaun ne'ebé bele disponibiliza ba públiku relasiona ho despezas orsamentais, *tenderizasaun* ka adjudikasoens, kontribuisoens husi

⁷ See <http://www.bancocentral.tl/PF/Reports.asp> and <http://www.anpt-tl.org/webs/anptlweb.nsf/vwAll/Publish%20What%20You%20Pay>

parseirus dezenvolvimentu ho implementasaun programa. Portal Transparênsia ne'e Ministériu Finansas mak jere no konsiste husi portais haat website nian hanesan tuir mai:

- **Portal Transparênsia Orsamental** – detalles kona-ba oinsá halo despezas, despezas saída mak halo ona no sei resta orsamentu hira los. (<http://www.budgettransparency.gov.tl>)
- **Portal Transparênsia Ajudas**–detalles kona-ba osan hira los mak parseirus dezenvolvimentu sira fó no osan ne'e gasta ba saída los. (<http://www.aidtransparency.gov.tl>)
- **Portal eAprovisionamentu**- detalles kona-ba adjudikasoens atuais no sesee los mak simu kontratu ho nia kustu. (<http://www.eprocurement.gov.tl>)
- **Portal Resultados Governu nian** – detalles kona-ba prioridades Governu nian, monitoriza implementasaun programas, no hatudu sesee los mak benefisia ho projetus. (<http://www.governuresults.gov.tl>)

Tranzisaun Ajênsia Dezenvolvimentu ba Ajênsia Polítika Ekonómika no Investimentu

108. Ajênsia Dezenvolvimentu Nasional monitoriza no akonsella kona-ba implementasaun *Planu Estratéjiku Dezenvolvimentu Timor-Leste*, avalia propostas infra-estruturas prinsipais, monitoriza no halo relatóriu kona-ba nia ezekusaun. La kleur tan sei liu faze tranzisaun ne'e hodi sai hanesan Ajênsia kona-ba Polítika Ekonómika no Investimentu ne'ebé sei ezerse funsoens adisionais inklui planeamentu, dezeńu no monitorizasaun ba programas ho projetus estratéjikus governu nian ho mos responsabilidade atu asegura investimentu boot no kriaun empregu. Sei delineia abordajens ho inisiativas atu konduz dezenvolvimentu Timor-Leste nian, kresimentu ekonómiku no diversifikasaun industrial. Ajênsia sei iha kompetênsia atu komisiona peskiza independente no fo konsellus kona-ba asuntus ekonómikus, sosias no meu ambiente lubun ida, ne'ebé afeta Timor-Leste no sei foka liu ba maneiras oinsá bele alkansa ekonomia ida ne'ebé produtiva liu.

Desentralizasaun

109. Governu Timor-Leste buka atu onra Nasaun nia kometimentu Konstitusional kona-ba desentralizasaun ho sistema governu lokal. *Planu Estratéjiku Dezenvolvimentu Timor-Leste no Governu nia Programa* rurua inklui kometimentu ida atu implementa sistema governu lokal nian ida ne'ebé konsistente ho Konstituisaun. Liu 70 pursentu Timoroan moris iha áreas rurais. Ne'e signifika katak, ba ema barak, Governu sentral iha Dili ne'e dook tebes husi sira-nia aldeias ho sidades, no susar tebes ba sira atu envolve direta no regularmente ho Governu. Difísil mos ba Governu atu identifika no responde lailais no adekuadamente ba nesidades comunidades remotas. Kintu Governu Konstitusional hakarak atu hakbesik liu an ba populasaun Timor no fó ba sira biban atu partisipa iha desizoens ne'ebé afeta sira-nia moris, famílias no comunidades.

110. Lei hodi estabelese munisipalidades hanesan entidades únikas governu lokal nian iha Timor-Leste, Parlamentu aprova ona iha 2009. Munisípius sanulu-resin tolu identifika ona, bazeia ba distritus lokais ne'ebé iha ona. Ita-nia dezafiu agora ne'e atu buka hetan dalan ne'ebé dí'ak liu atu inkorpora estruturas distritus, sub-distritus no suku ne'ebé iha, ba iha sistema governu lokal ne'ebé konsistente ho Konstituisaun no reflète tradisoens kulturais no vínkulus ka lasus komunitárias ne'ebé forte povu Timor tomak nian.

111. Reforma ida ne'e la'ós de'it kestaun kona-ba oinsá estabelese prosesu ida hodi hili representantes lokais. Sei inklui dezenvolvimentu kompetênsias ho kapasidades ne'ebé prezisa hodi administra órgauns munisipais no halo planu, jere no presta servisu públikus iha nível lokal. Sistemas diferentes barak kona-ba governu no administrasaun lokal eziste iha mundu tomak. Atu dezeńia ita-nia sistema foun iha Timor-Leste, ita iha oportunidade atu aprende husi experiênsias paizes sira-seluk

nian no dezenvolve modelu ida ne'ebé kondiz liu ho ita-nia nasaun nia sirkunstânsias únikas, tradisoens ho kultura.

Justisa

112. Dezenvolvimentu setor justisa vital tebes hodi asegura kultura governasaun demokrátika, no mos estabilidade no dezenvolvimentu iha Timor-Leste.

113. Kintu Governu Konstitusional kontinua reforsa independênsia majistradus sira-nian, autonomia Akuzador Públiku ho profesionalizmu husi profisaun legal ka jurídika. Linguajen ne'ebé simples utiliza iha lejislasaun no iha diálogu regular ho sociedade siviil no públiku hodi dezenvolve leis. Governu servisu mos atu bele providensia servisu justisa iha distritus liuhusi dalan destaka tan majistradus, prokuradores, ho defensores públikus iha paíz tomak laran. Hola ona medidas atu regula no promove meus alternativus hodi rezolve disputas, hanesan mediasaun no konsiliaaun, partikularmente iha matérias relaciona ho traballadores, familia no hadau-malu rai.

114. Dezenvolvimentu kapasidade téknika no umana iha áreas investigasaun kriminal no siênsias forensikas seluktán sai hanesan prioridade hodi nune'e bele aborda krimes ne'ebé todan no kompleksu, hanesan krime organizadu, korrupsaun, brankeamentu monetáriu, no mos krimes doméstikas ho seksuais.

115. Fó mos prioridade ba dezenvolvimentu ho implementasaun lejislasaun kona-ba propriedades governu no utilizaun rai iha Timor-Leste tanba nia importânsia vital ba Timor-Leste nia dezenvolvimentu ekonómiku.

Reforma Seguransa

116. Seguransa einjeral ho seguransa sidadauns sira nian kontinua hanesan prioridade ba Governu. Prosesu reforma hakotu ona siklu krizes tanba instabilidade no kria konfiansa boot liu entre povu ho forsas seguransa.

117. Iha Marsu 2011, responsabilidade primária polisiamentu halo entrega husi UNPOL ba PNTL, ne'ebé hatudu katak remata prosesu ida. Koloka Distritus tolu tuir programa monitorizasaun hodi rezolve dezafisu reziduais. Ladún iha ona insidentes boot dezde hala'ó entrega gradual, no taixas krime menus liu, tuir relatóriu. Mandatu manutensaun paz Nasoens Unidas nian hakotu iha Dezembru 2012 - hanesan marku istóriu ida hodi asinala era foun tranzisaun husi instabilidade ba dezenvolvimentu.

Relasoens internasionais ho ASEAN

118. Hetan tiha estabilidade metin depoisde períodu naruk ida buka harii paz, ohin loron Timor-Leste konsentra liu ba konstrusaun Estadu. Komuidade internacional suporta Timor-Leste nia tranzisaun ne'e, ne'ebé la'ó ho susesu, husi frajilidade ba reziliênsia, no agora ita-nia nasaun ne'e aumenta tan nia relasaun internacional hodi nune'e, hanesan retornu, ita mos bele fó kontribuisaun ba sira.

119. Novembru liubá, Timor-Leste partisipa iha primeira reuniaun trilateral ho Prezidente Indonézia no Primeiru-Ministru Australia. Ita mos hahú reunioens trilaterais anualmente entre ita-nia Ministrus Defeza ho Ministrus Negósius Estranjeirus.

120. Timor-Leste halo ona pedidu atu tama ba ASEAN. Timor-Leste hanesan parte ida hotu husi Sudeste Aziátiku, hakarak mos hola parte iha ASEAN hodi hamutuk kontribui ba kresimentu rejional, progresu sosial no dezenvolvimentu kultural ho espíritu parseria.

121. Iha 2014 Timor-Leste sei lidera grupu nasoens CPLP. Ne'e responsabilidade boot tebetebes no mos onra ba Timor-Leste, hodi ita-nia nasaun mos bele buka fó kontribuisaun ba solidariedade no dezenvolvimentu paizes ne'ebé ko'alia lian Portugêz iha mundu.

122. Timor-Leste hagle'an tan ona relasaun ho Paizes Illas iha Pasífiku. Timor-Leste partilla dezafius barak ho oportunidades ne'ebé illas iha Pasífiku ne'e hasoru no ita-nia nasaun buka atu kontribui maka'as hanesan observador iha Forum anual Pasífiku nian no liuhusi ita-nia relasoen bilaterais ne'ebé forte.

123. Iha Abril tinan ne'e, Timor-Leste hetan onra boot tanba simu lideransa hodi prezide 69a. sesaun Komisaun Ekonómika no Sosial Nasoens Unidas nian ba Ázia Pasífiku. Primeiru-Ministru Timor-Leste sei prezide sesaun ida ne'e tinan oin mai no servisu ho ESCAP, ho nasoens Ázia Pasífiku, atu bele hetan tan progresu no mellora dezenvolvimentu umanu.

Aneksus

A: Grupu Traballu Setor Estratéjiku Ekonómiku

B: Grupu Traballu Setor estratéjiku Sosial

C: Grupu Traballu Setor Estratéjiku Dezenvolvimentu Infra-estruturas

**D: Grupu Traballu Setor estratéjiku Governasaun no Dezenvolvimentu
Institusional**

E: Ministérius Kintu Governu Konstitusional

<p>Primeiru-Ministru no ministru Defeza no Seguransa, Kay Rala Xanana Gusmão</p> <ul style="list-style-type: none"> - Sekretária Estadu Promosaun Igualdade: Idelta Maria Rodrigues - Sekretáriu Estadu Juventude no Desportu: Miguel Manetelo - Sekretáriu Estadu Formasaun Profisional no Plítika Empregu: Ilídio Ximenes da Costa - Sekretáriu Estadu Fortalesimentu Institucional: Francisco Soares - Sekretária Estadu Apoiu no Promosaun Setor Privadu: Veneranda Martins 	<p>Vise Primeiru-Ministru no Koordinator Asuntus sosiais: Fernando Lassama de Araújo</p> <ul style="list-style-type: none"> - Sekretária Estadu Promosaun Igualdade: Idelta Maria Rodrigues - Sekretáriu Estadu Juventude no Desportu: Miguel Manetelo - Sekretáriu Estadu Formasaun Profisional no Polítikas Empregu: Ilídio Ximenes da Costa 	<p>Ministru Estadu Prezidênsia Konsellu Ministrus: Agio Pereira</p> <ul style="list-style-type: none"> - Sekretáriu Estadu Konsellu Ministrus: Avelino Coelho da Silva - Sekretáriu Estadu Asuntus Parlamentares: Maria Terezinha Viegas - Sekretáriu Estadu Media: Nélio Isaac Sarmento -
<p>Ministru Estadu Negósius Estranjeirus no Kooperasaun, José Luís Guterres</p> <ul style="list-style-type: none"> - Vise Ministru Negósius Estranjeirus no Kooperasaun: Constâncio da Conceição Pinto - Sekretáriu Estadu Asuntus ASEAN: Roberto Soares 	<p>Ministru Defeza no Seguransa</p> <ul style="list-style-type: none"> - Sekretáriu Estadu Defeza, Júlio Tomás Pinto - Sekretáriu Seguransa: Francisco Guterres 	<p>Ministra Finansas, Emília Pires</p> <ul style="list-style-type: none"> - Vise Ministra Finansas: Santana Cardoso
<p>Ministru Justisa: Dionísio Babo Soares</p> <ul style="list-style-type: none"> - Vise Ministru Justisa: Ivo Jorge Valente - Sekretáriu Estadu Terras no Propriedades: Jaime Xavier Lopes 	<p>Ministru Saúde: Sérgio Gama Lobo</p> <ul style="list-style-type: none"> - Vise Ministra Étikas no Prestasaun Serisus: Natália Araújo - Vise Ministra Jestaun, Suporte no Rekursus: Maria do Céu da Costa 	<p>Ministru Edukasaun: Bedito Freitas</p> <ul style="list-style-type: none"> - Vise Ministra Ensinu Báziku/Primáriu: Dulce de Jesus Soares - Vise Ministru ensinun Sekundáriu: Virgílio Simith - Vise Ministru Ensinu Superior: Marçal Avelino Ximenes
<p>Ministru Administrasaun Estatal: Jorge da Conceicao Teme</p> <ul style="list-style-type: none"> - Sekretáriu Estadu Desentralizasaun Administrativa: Tomás Cabral - Sekretáriu Estadu Dezenvolvimentu Lokal: Samuel Mendonça 	<p>Ministru Komérsiu, Indústria no Meiu Ambiente: António da Conceição</p> <ul style="list-style-type: none"> - Vise Ministru Komérsiu, Indústria no Meiu Ambiente: Abel da Costa Ximenes - Sekretáriu Estadu Komérsiu: Ricardo Cardoso Nheu - Sekretáriu Estadu Industria no Kooperativas: Filipus 'Nino' Pereira - Sekretáriu Estadu Mei ambiente: Nominando Soares Martins 'Buras' 	<p>Ministra Solidariedade Sosial: Isabel Guterres</p> <ul style="list-style-type: none"> - Vise Ministru solidariedade Sosial: Jacinto Rigoberto de Deus - Sekretáriu of Estadu for Social Security: Vítor da Costa - Sekretáriu Estadu Asuntus Kombatentes Libertasaun Nasional Affairs: Júlio Sarmento da Costa
<p>Ministru Obras Públikas: Gastão Francisco de Sousa</p> <ul style="list-style-type: none"> - Sekretáriu Estadu Obras Públikas: Luís Vaz Rodrigues - Sekretáriu Estadu Eletrisidade: Januário Pereira - Sekretáriu Estadu Água, Saneamentu no Dezenvolvimentu Urbanu: Elias Pereira Moniz 	<p>Ministru Transporte no Komunikasoens: Pedro Lay</p> <ul style="list-style-type: none"> - Vise Ministru Transporte no Komunikasoens: Flávio Cardoso Neves 	<p>Ministru Agrikultura no Peskas: Mariano Assanami Sabino</p> <ul style="list-style-type: none"> - Vise Ministru Agrikultura no Peskas: Marcos da Cruz - Sekretáriu Estadu Florestas no Konservasaun Natureza: João Fernandes - Sekretáriu Estadu Peskas: Rafael Pereira Gonçalves - Sekretáriu Estadu Pekuária: Valentino Varela
<p>Ministru Turizmu: Francisco Kalbuadi Lay</p> <ul style="list-style-type: none"> - Sekretáriu Estadu Artes no Kultura: Maria Isabel de Jesus Ximenes 	<p>Ministru Petróleu no Rekursus Minerais: Alfredo Pires</p>	